

姜濤3年後約滿ViuTV

成員若不續約 MIRROR必解散



姜濤於節目中自爆3年後與公司完約。

資料圖片

早前 MIRROR「人氣王」姜濤於節目自爆3年後約滿ViuTV，昨日隊友Lokman出席活動時表示若有人不續約，MIRROR必定解散，AK則稱要視乎公司誠意，才決定是否續約。

人氣男團MIRROR「夜粥小組」成員楊樂文（Lokman）、江熾生（Anson Kong，AK）、王智德

（Alton）與陳瑞輝（Frankie）昨日到旺角和尖沙咀進行花車巡遊，宣傳下月舉行的演唱會，吸引逾200粉絲應援。他們在旺角落車派Postcard時，粉絲爭先恐後引起混亂，遭商場投訴，粉絲追車時更險象環生！

「夜粥小組」表示演唱會暫時開一場，會否加場要視乎反應。提到姜濤早前一時口快自爆3年後約滿，AK表示：「份份約都有期限，實際數字係幾多我哋就唔講。到時候真係完約，大家一定會知道。我哋唔會秘密解散，到時MIRROR有啲咩去向，一定會同大家講。」Lokman則說：「無論3年定30年，人總需要勇敢生存，路一定要走。（如果有成員唔續約，擔唔擔心MIRROR解散？）唔續約就一定散，我覺得各人有各人嘅方向，各人行咩方向，我哋各人都會支持。」

AK視乎公司誠意

AK表示如何走下去就要看公司誠意：「誠意係好需要成本，僱主同員工嘅一個協調。（咁公司過去誠意係點？）當日我只係一個黃毛小子，嗰時嘅概念同埋物價會升值，唔可以用嗰時嘅時間、感情去計。我哋未傾到去呢個階段，所以無可奉告，依家只係專心做演唱會。」

提到Lokman與Alton經營的食肆結業，Lokman透露現時只剩服裝生意：「食肆生意結業唔會影響信心，但會影響小心，以後會諗多幾步再行一步。」他覺得做生意難免要交學費，不可能一步登天。問到會否再做食肆生意？他說：「經過呢兩次，暫時唔會搞，學多啲、了解多啲先。」Alton亦指暫時沒計劃再開食肆，待市況好轉才再作打算：「不過經營食肆係我嘅心願。」



左起：Alton、Lokman、AK與Frankie到鬧市為演唱會造勢。

張智霖聽醫生話 唔節制飲食

張智霖前晚為《中年好聲音3登峯之戰》擔任評審，賽後他表示對賽果滿意，讚比賽氣氛很好，自己樂在其中：「有好多首歌我都有眼濕濕嘅感覺，但做評審要專業，所以盡量要忍住。」談到他說「不完美之中的完美」評論黃博唱功，他解釋：「唱歌有時唔一定每粒音都完美先成功，最重要係有冇投入感情，做到動人心弦、觸動觀眾內心。」

談到他早前入院切除膽石，張智霖表示現時身體很好，並將拍無綫新劇，已做足準備拍沉重劇情。問到有否爭取多點時間休息？他說：「有，但若果爭一場半場，都想以劇為先，我想好投入去拍一套大家鍾意嘅戲。（有冇聽老婆袁詠儀話注意飲食？）冇，因為我做咗手術，以前食肥膩嘢會痛，但依家有咗膽石，我要試多啲添，醫生話要試吓係咪運作正常。」



古淖文歌精舞勁。

張智霖預告將拍無綫劇。

古淖文跳唱搞High粉絲

《中年好聲音2》冠軍古淖文（German）上周六應邀到中山出席千人宴任表演嘉賓，與樂迷共度母親節。當晚他唱了6首歌曲，包括最新派台歌《Follow Me》，他與舞蹈員勁歌熱舞，瞬間炒熱氣氛。German笑問：「點解大家今晚比平時特別熱情？」原來翌日舉行《中年好聲音3》決賽，German即將卸任，粉絲開心與偶像一起踏入另一里程碑而感到興奮。為回饋粉絲，German率領全場合唱《月亮代表我的心》，作為獻給所有父母的母親節禮物。

梁思浩化身解決師

梁思浩早前加盟新城廣播，聯同黎莉莉主持玄學命理節目《命運解惑師》，為聽眾解答人生疑難。思浩分享深刻個案：「有一個來自海外嘅女聽眾，話佢爸爸不停問佢攞錢，可能用嚟召妓，導致呢位女聽眾情緒好困惑，懷疑爸爸『撞邪』或被落『降頭』。」經分析後，思浩判斷對方父親為性成癮問題，隨即轉介律師及心理專家跟進。思浩強調節目宗旨是為聽眾提供實際幫助，並感謝大家對他信任：「人生有困惑就打畀我！我識人多，可以幫手搵解決方法。」



梁思浩樂意為聽眾解答疑難。